

M138: Voraue Marienlob (Bücher Mosis 4)

- 0,1 wîlent uns sageten .
0,2 di wîsen ez nie ne verdageten .
0,3 von den wir wurden innen .
0,4 künftiger dinge .
0,5 ire rede was tougen .
0,6 si bedorften wole des gelouben .
0,7 si kunten ze wâre .
0,8 vore manic hundert jâren .
0,9 von einer gebürte diu was wunderlich .
0,10 nie necheiniu wart ir gelîch .
0,11 noch ne wirdet niemer mêre .
0,12 wande si was âne sêr .
0,13 unde âne gelust des vleisches .
0,14 von schirmen des heiligen geistes .
0,15 tohter was muoter des kindes .
0,16 hier wahse der geloube mit wîstuome des sinnes .
0,17 vrô sulet ir ez vernemen .
0,18 ditze privilegium wart gegeben .
0,19 wîbe nie nechein .
0,20 wan unserre vrouwen alterseine .
0,21 Jesaias der guote .
0,22 mit wârhaften muote .
0,23 von einer gerte er sagete .
0,24 als er ez vernomen habete .
0,25 er was wîlent in der alten ê .
0,26 unde quat si solte erspringen von Jesse .
0,27 Dâvîdes vater was der selbe man .
0,28 alsô wir ez gelesen hân .
0,29 der von gotes gewaltiger hant .
0,30 wîlent des rîches habete gewalt .
0,31 den geheize er vone gote entvie .
0,32 der dâr nâch vile wole ergie . daz
0,33 wuocher sînes lîbes .
0,34 pflegente würde des rîches .
0,35 deme got des geswuor .
0,36 daz berihtet würde der sîn stuol .
0,37 mit michelen êren .
0,38 von êwen unze êwen .

0,39 den eit hât er behalten .
0,40 sîn sun wile des rîches walten .
0,41 er ist genant Iskiros .
0,42 wande sîn gewalt ist sô grôz .
0,43 des mûgen wole entwînden .
0,44 sîne widerwînnen .
0,45 nû nemet des wîssagen ware .
0,46 er quat eine bluomen solte si tragen .
0,47 tiure . unde guote .
0,48 edele unde vruote .
0,49 lilje ist er genennet .
0,50 sô wole in der in erkennet .
0,51 gezierde ist er der erde .
0,52 diu teler in habent unde niht di berge .
0,53 über den ruowet allermeiste .
0,54 unseres hêrren minnesamer . geist
0,55 mit sibenvaltiger gebe .
0,56 anderes sich des nieman pflege .
0,57 diu êreste heizet wîstuom .
0,58 diu andere vernunst âne ruom .
0,59 den dritten nennet man rât .
0,60 gesach in got der in hât .
0,61 daz schulet ir ouch merken .
0,62 diu vierde heizet sterke .
0,63 gewizzede nimet diu vînfte namen .
0,64 ob ir di sehsten wellt ervaren .
0,65 diu machet guot gemüete
0,66 si heizet rehte gûete .
0,67 diu sibende gebe in dirre zale .
0,68 daz ist gotes vorhte überal .
0,69 diu gerte bezeichnenet di maget .
0,70 diu von eineme worte wart berehaft .
0,71 von der gotes . [magenkrefte]
0,72 âne mannes wineschefte
0,73 diu bluome den einborenen sun .
0,74 unser vrouwen sancte Marien .
0,75 di siben gebe er niht entvie .
0,76 teilnûmftclîcher hier .
0,77 alsô tuont hiute .
0,78 di geistlichen liute .
0,79 wande er ist daz gotes sal .
0,80 dâr inne bûwet überal .
0,81 diu goteheit gemeine .
0,82 âne aller slahte teile .
0,83 er rihtet ouch Dâvîdes stuol .
0,84 des hât er êwiclîchen ruom .
0,85 vile hôch ist daz sîn reht .
0,86 daz ne hoeret der kneht .

0,87 wande ez ist tougen .
0,88 er ne sihet ez mit den ougen .
0,89 er refset mit gewalte .
0,90 di hêrren unde di schalke .
0,91 di vrouwen unde di diuwe .
0,92 daz tuont di sîne triuwe .
0,93 swer im gerne dienet .
0,94 deme wirdet wole gelônnet .
0,95 nû loben wir di gerten .
0,96 unde grüezen si mit worten .
0,97 heil wis dû magedîn .
0,98 des himeles hêriu küniginne .
0,99 geboren von Jesses stamme .
0,100 des gotes sunes amme .
0,101 des veldes bist dû bluome .
0,102 wer mohte sich dîn genüegen .
0,103 Maria Maria .
0,104 edeliu liebiu vrouwe .
0,105 von dir ist geboren lilium .
0,106 bluome convallium .
0,107 der diumüete êre .
0,108 Krist got unser hêrre .
0,109 der dîn smac ist sô getân .
0,110 er ne mac gelîches niht hân .
0,111 salbe überal nechein .
0,112 dîn munt ist alsô ein honicseim .
0,113 under dîner zungen .
0,114 dâ ist gewisse vunden .
0,115 honic unde milch genuoc .
0,116 dû bist inniclichen guot .
0,117 von dir ist errunnen .
0,118 der lilje ist aller wünne .